

忠武誌卷之五

遂寧張鵬翮輯

劉廷璣

張懋齡

全校

前芳往軌舉足訓方型俗而世遠風邈文獻無徵是亦尙友者之所慨也維忠武侯大節彰彰固已垂之青史而當年遺事雖傳聞異辭要可述而誌之備尙論者考焉誌遺事

遺事

龐德公

孔明在南陽同縣龐德公素有重名司馬徽兄事之娶孔明小姊

史記卷之五
夫妻相敬如賓孔明每至其家獨拜牀下德公初不令止其從子
統少時樸鈍未有識者惟德公與徽重之德公嘗謂亮爲卧龍統
爲鳳雛徽爲冰鑑

黃承彥

黃承彥者高爽開朗爲沔陽名士謂諸葛孔明曰聞君擇婦身有
醜女黃頭黑色而才堪相配孔明許卽載送之時人以爲笑鄉里
爲之諺曰莫作孔明擇婦止得阿承醜女

武侯說孫權於柴桑

曰海內大亂將軍起兵據有江東劉豫州亦收衆漢南與曹操共

爭天下今操芟蕪大難畧已平矣遂破荊州威震四海英雄無所
用武故豫州遁逃至此將軍量力而處之若能以吳越之衆與中
國抗衡不如早與之絕若不能當何不按兵束甲北面而事之今
將軍外託服從之名而內懷猶豫之計事急而不斷禍至無日矣
又曰田橫齊之壯士耳猶守義不辱況劉豫州帝室之胄英雄
蓋世衆士仰慕若水之歸海事之不濟此乃天也安能復爲之下
乎又曰豫州軍雖敗於長坂今戰士還者及關羽水軍精甲萬
人劉琦合江夏戰士亦不下萬人曹操之衆遠來疲敝聞追豫州
一日一夜三百餘里此所謂強弩之末勢不能穿魯縞也故兵法

是之曰必蹶上將且北方之人不習水戰又荊州之民附操者逼
兵勢耳非心服也將軍誠能用猛將統兵數萬與豫州協規同力
破操必矣操軍破必北還如此則荆吳之勢強鼎足之形成成敗
之機在於今日

權悅即遣周瑜等隨亮

拒操遂破操於赤壁

先主結毼

按字典毼結毛爲飾卽今馬及
弓梁上纓之也字從耳不從目

先主性好結毼時適有人以髦牛尾與先主者先主因手自結之
亮進曰明將軍當復有遠志但結毼而已耶備乃投毼而言曰是
何言與我聊以忘憂耳亮遂言曰將軍度劉鎮南孰與曹公備曰
不及亮又曰將軍自度何如也備曰亦不如曰今皆不及而將軍

之衆不過數千人以此待敵得無非計乎備曰我亦愁之當若之
何亮曰荊州非少人而著籍者寡平居發調則民心不悅可與劉
鎮南令凡有遊戶皆使自實因錄以益衆可也備從其計故衆遂
强

魏
畧

刺客

曹操遣刺客見先主方得交接問伐魏形勢甚合主計稍欲親近
刺客尙未得便會亮至客如廁先主謂亮曰向得奇士足以爲君
助亮問所在先主曰起者其人亮徐歎曰觀客色動而神懼視低
而忤數奸形外漏邪心內藏必曹氏刺客也追之已越牆而走

開門掃地

亮遣魏延諸軍并兵東下惟自留萬人守城司馬懿率二十萬衆拒亮而與延軍錯道徑至前當亮十六里所偵候白懿說亮在城中兵少力弱亮亦知懿垂至已與相偪欲前赴延軍相去又遠回迹反追勢不相及將士失色莫知其計亮意氣自若勅軍中皆卧旗息鼓不得妄出菴幔又令大開四城門掃地却灑懿嘗畏亮持重而猥見勢弱疑其有伏兵於是引兵北趣山明日食時亮謂叅佐拊手大笑曰司馬懿必謂吾怯將有彊伏循山走矣邏候還白如亮所言懿後知深以爲恨

拔三郡

亮出祁山隴西南安二郡應時降圍天水拔冀城鹵姜維驅畧士
女數千人還蜀人皆賀亮愀然有戚容謝曰國家威力未全使百
姓困於豺狼之吻一夫有死皆亮之罪以此稱賀能不爲愧

俱郭冲條

涪陵

涪陵山險水灘人性慤勇多獷蠻之民縣邑阿黨鬪訟必死無蠶
桑少文學漢時赤甲兵常取其民獨丞相亮時亦發其勁卒三千
人爲連弩士其性質直雖徙他所風俗不變

華陽國志

滇酋姓氏

滇酋有六各號爲詔彝語謂王爲詔其一曰蒙舍詔其二曰浪穹
詔其三曰遼賧詔其四曰施浪詔其五曰磨些詔其六曰蒙雋詔
兵將不能相君長至漢有仁果者九龍八族之四世孫也强大居
昆彌川傳十七世至龍祐那當漢建興三年諸葛武侯南征雍闓
師次白崖川獲闓斬之封龍祐那爲酋長賜姓張氏割永昌益州
地置雲南郡於白崖諸彝慕侯之德漸去山林徙居平地建城邑
務農桑諸郡於是始有姓氏

滇載記

牂牁

漢時牂牁師火濟者從丞相孔明破孟獲有功封羅甸國王卽今宣慰使安民遠祖也

枕磚

侯初平南彝夜聞軍中多謳歌思歸遂詔衆各與一磚曰若輩久苦行役欲過返耶枕此而卧詰朝抵家矣從者果然不用命者終莫能歸今雲南營內有一城居民皆四川人云卽其後也

迹異錄

巾幘

三國志孔明以巾幘遺司馬懿巾幘女子未笄之冠蜀中名曇籠蓋笑其堅壁不出如閨女之匿藏也又漢輿服志云公卿列侯夫

人紺繪幘總是婦人以巾上覆髮者然曇籠之說更有意義

清夜叢談

蔓菁

諸葛公所止必令軍士種蔓菁取其纔出甲可生啖也葉稍舒可煮食也久居則隨以滋長也棄去不足惜也回卽易尋而採之也冬有根可斷食也比諸蔬屬其利不亦溥乎三蜀江陵之人今呼

蔓菁爲諸葛菜

劉禹錫嘉話錄

戴天孝

蜀山谷民皆冠帛巾相傳爲諸葛公服所居深遠者後遂不除今蜀人不問有服無服皆戴孝帽市井中人十常八九謂之戴天孝

余嘗以重午登南城樓觀競渡戲兩岸男女匝水而聚望之如沙城焉

白紙繫髻

蠻酋自謂太保大抵與山獠相似但有首領其人椎髻以白紙繫之云尙爲諸葛制服也

俱浣水續談

張裔稱諸葛

孔明駐漢中張裔領留府長史嘗稱曰公賞不遺遠罰不阿近爵不可以無功取刑不可以貴勢免此賢愚所以僉忘其身者也

蜀志

桓溫小史問答

桓溫征蜀猶見武侯時小史年百餘歲溫問諸葛丞相今誰與比
答曰葛公在時亦不覺異自公歿後不見其比

殷云
卜說

秣陵山

先主曾使諸葛公至京因覩秣陵山阜乃歎曰鍾山龍盤石頭虎
踞帝王之都也

曹操謝言

曹操刑法嚴峻果於殺戮乃心欲用乎孔明孔明自陳不樂出身
操謝遣之曰義不使高世之士辱於汚君之朝也其鞭撻九有草

創皇基亦不妄矣

抱朴
子

葛巾羽扇

武侯與司馬懿在渭濱將戰懿戎服蒞事使人密覘武侯乃乘素輿葛巾持白羽扇指揮三軍懿聞而歎曰諸葛君可謂名士矣

保券

先主寓荊州從南陽大姓晁氏貸錢千萬以爲軍需諸葛孔明作保券至宋猶存

武侯後身

韋南康始生有胡僧往視謂曰別後無恙乎韋氏問故答曰武侯後身也吾往與之友故不遠而來因字之城武

宣室志

補六詔考

南詔本烏蠻別種姓蒙氏蠻謂王爲詔自言哀牢之後代居蒙
舍州爲渠帥

蒙騫詔最大後爲南詔所併

越析詔或謂磨些詔居故越析州西距曩葱山一日後歸南詔

浪穹詔其王鐸羅望爲浪穹刺史凡浪穹遼賧施浪總謂之浪
人亦稱三浪

遼賧詔其王豐咩據遼賧後爲南詔徙居永昌

施浪詔其王施望久居矣苴和城有施各皮者亦八詔之裔

維忠武侯休休有容集思廣益開誠布公公議相取法正後事
獨付蔣琬一時名雋在位各盡其長雖難馭如儀延亦收爪牙
之用被廢之李平廖立聞侯之卒爲之泣下有致死者公誠服
人直其然乎誌用人

用人

先主領荊州龐統以從事守耒陽令不治免官吳將魯肅遺先主
書曰龐士元非百里才也使處治中別駕之任始當展其驥足耳
諸葛亮亦言之於先主先主見統與譚善大器之以爲治中從事
討鹵將軍黃忠勇毅冠三軍破斬夏侯淵先主欲用忠爲後將軍

而以關羽爲前將軍諸葛亮說先主曰忠之名望素非關馬之倫也今使令同列馬張在近親見其功尙可喻指關遙聞之恐必不悅得無不可乎先主曰吾當自解之

法正多陰謀善設奇制變昭烈之取益州皆其力也諸葛亮與正雖好尙不同以公議相取每奇正智術

許靖爲劉璋蜀郡太守先主進圍成都靖欲踰城出降先主薄之定蜀後益無意於靖孔明諫曰靖人望不可失也借其名以疎勳宇內於是稍尊之尋拜司徒靖年已踰七十愛樂人物誘納後進清談不倦孔明皆爲之拜